

Den cuadra di renovacion di Politica AVP a funda Instituto pa Formacion Politico

Fundacion ta dedica na Digna Lacle-Herrera



ORANJESTAD (AAN): Dilanti di Notario Ralph Yarzagaray partido AVP, representa pa su Presidente mr. Mike Eman y FESCA representa pa drs. Arjen Alberts y Rene Herde, a funda un instituto nobo: "Fundacion Instituto Formacion Politico Digna Lacle-Herrera".

E instituto aki tin como meta pa bay duna curso riba nivel estatal, politico-etico, fiscal, social-financiero-economico, labor, administrativo y organizatorio.

Miembronan di Directiva di e Fundacion aki ta: Luciano Milliard, Presidente, docente di estudionan constitucional na Universidad; drs. Paul Croes, Secretario, Politicologo y funcionario publico na Departamento Relacionnan Exterior, mr. Frederick Nuboer, Tesorero, Fiscalista; mr. Angele Martijn, Miembro, Abogado; Edwin Bibiano Abath, Miembro; funcionario publico na Departamento di Salud; mr. David Kock, Miembro, Abogado.

Mr. Mike Eman a splica cu e formacion di e instituto aki ta den cuadra di continuacion di e proceso di renovacion di politica cu AVP a inicia despues di eleccion 2001 bao

di e pensamiento, scucha, pensa y trece cambio.

E reflexion interno aki conduci pa dirigentenan nobo di partido bao liderazgo renovador di mr. Mike Eman a rindi progreso grandi den organizacion y contenido di AVP. Un acercamento profesional sosteni pa un instituto scientifico FESCA a pone e AVP renova den un posicion pa recupera no unicamente rapido pero cu un frotaleza interno cu ta basa su politico riba profundisacion y contacto cu "orea habri" pa pueblo.

Despues di eleccion 2005 e lider renovador di partido, mr. Mike Eman a anucia cu e esfuersonan di renovacion di politica ta bay haya un dimension pafor di partido tambe.

Na formacion di Instituto Digna Lacle-Herrera e lider di AVP, mr. Mike Eman a bisa cu e base pa un team profesional ta un preparacion profundo y amplio. E tin confianza cu e instituto aki cu e profesionalnan aki den e Directiva lo duna un aporte grandi na renova y profesionalisa politica. E tabata tin hopi elogio pa e Presidente di e Fundacion, Luciano Milliard y miembronan drs. Paul Croes, mr. Frederick Nuboer, mr.

Angele Martijn, Edwin Bibiano Abath, mr. David Kock, Mr. Luciano Milliard a



muestra cu un instituto asina ta hopi importante pa eleva e nivel di politica. E a muestra cu e directiva ta hopi intusiasma cu e trabaonan nan dilanti y ta contento cu ta cuminsa di biah cu e promer curso.

Mike Eman ta splica cu e instituto ta bay haya e nomber di Digna Lacle-Herrera, pasobra e politica aki semper a para pa un politica na nivel cu un

contenido halto di etica y decensia caminda enfazis ta riba e capacidad y voluntad pa sirbi y no den habilidad pa destrosa un otro.

E promer cursonan di e Instituto ta cuminsa Diarason 5 di april 2006 pa 7.30 di anochi na Cas di Partido. Ta trata di un curso di 8 siman riba Economia y Finanzas cu ta worde presenta pa drs. Arjen Alberts. Esnan interesa ainda por inscribi na Cas di partido.